



Stúdentaráð Háskóla Íslands

## Umsögn Stúdentaráðs Háskóla Íslands vegna frumvarps til laga um frekari aðgerða til að mæta efnahagslegum áhrifum í kjölfar heimsfaraldurs kórónuveiru

726. mál, lagafrumvarp

150. löggjafarþing 2019-2020

22. apríl 2020

**Stúdentaráð Háskóla Íslands** harmar að stúdentum sé ekki veittur réttur til atvinnuleysisbóta í sumar með öðrum aðgerðarpakka ríkisstjórnarinnar vegna efnahagsáhrifa COVID-19. Atvinnuskapandi úrræði ríkisstjórnarinnar er gott skref en SHÍ vonar þó að til staðar sé pólitískur vilji ríkisstjórnar Íslands til þess að tryggja námsmönnum það fjárhagsöryggi sem þeir hafa kallað eftir.

Stúdentar eru fjölbreyttur hópur. Þeir standa misvel félagslega, eiga misgott bakland og munu ekki allir komast að í þau atvinnuskapandi úrræði sem stjórnvöld hafa boðað. Það er þess vegna sem Stúdentaráð hefur statt og stöðugt krafist atvinnuleysisbóta, samhliða aðgerðum sem sporna gegn atvinnuleysi. Til jafns við aðra greiða stúdentar sem vinna með námi, tryggingargjald af launum sínum sem standa á undir atvinnuleysistryggingasjóði. Á sama tíma eiga stúdentar engan rétt úr sjóðnum. Öllum landsmönnum, sem þess þurfa, skal tryggður í lögum réttur til aðstoðar vegna atvinnuleysis samkvæmt stjórnarskrá, en eins og staðan er í dag verða stúdentar án atvinnuleysisbóta og þess öryggisnets sem þær veita þegar þörfin er mest.

Þegar atvinnuleysi [stefnir í 17%](#) gefur augaleið að grípa þarf til aðgerða. 18-24 ára einstaklingum í atvinnuleit hefur fjölgað mest af öllum aldurshópum, eða um 52% frá febrúarmánuði samkvæmt [skýrslu Vinnumálastofnunar](#), en tölfræði yfir atvinnuleysi á Íslandi tekur ekki til námsmanna. Samkvæmt könnun SHÍ frá því í aprílbyrjun voru 40% stúdenta HÍ ekki komnir með sumarstarf. Í HÍ stunda nám rúm 13.000 manns og er 40% þeirra, um 5.200 manns. Því er um að ræða þúsundir námsmanna til viðbótar við þessar tölur Vinnumálastofnunar, sem vilja vinna en eru án starfs í sumar. Atvinnuskapandi úrræði ríkisstjórnarinnar fyrir námsmenn hljóða uppá um 3.500 sumarstörf ef framlög sveitarfélaga koma til.

Leiðir ríkisstjórnarinnar um sumarstörf, og það fjármagn sem lofað hefur verið, er vissulega hluti þess sem við höfum kallað eftir og því ber að fagna. Á sama tíma grípa aðgerðirnar ekki alla og þeir stúdentar sem eftir standa hafa engin fjárhagsleg úrræði. Stúdentar sem ekki eiga bakland eða eru verr staddir félagslega, lenda undir. Til SHÍ leita stúdentar sem sjá ekki fyrir sér að eiga í sig og á, eiga ekki fyrir skrásetningargjöldum, námsbókum eða almennum lífsnauðsynlegum útgjöldum í sumar og næsta haust. Betur má ef duga skal.



**Stúdentaráð Háskóla Íslands**

Stúdentaráð ítrekar [kröfur ráðsins](#) 12. apríl og Stúdentaráð hvetur stjórnvöld til þess að gefa stúdentum sama kost og aðrir landsmenn, á úrræði atvinnuleysisbóta ef allt annað þrýtur og óskar ráðið eftir að það verði gert með frumvarpi um frekari aðgerðir vegna kórónufaraldursins.